

13.08.2026

UKA2026/429

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Pisortat inissiaataanni attartortut ilinniagaqarnersiuteqarfiusumik ilinniagaqalernerminni ilinniarnernup nalaani inissiaminniiginnarsinnaanissaat, ineqarnermullu nammineq akiliutaat inoqutigiit amerlassusaat tunngavigalugit ilinniartut inaanni ineqarnermut akiliummut atuuttumut aallaaviatigut naapertuuttunngortinneqarnissaa qulakkeerniarlugu Naalakkersuisut kingusinnerpaamik UKA 2027-mi pisariaqartinneqartunik inatsisini malittarisassanilu allannguutissatut siunnersuuteqarnissaannik peqquneqarnissaat pillugu Inatsisartut aalajangiiffigisassaattut siunnersuut. Aaqqissuussineq ilinniagaqartup ukiuinik killilersorneqassanngilaq.
(Inatsisartunut ilaasortaq Gerth Mikaelen, Naleraq)

Tunngavilersuut:

Kalaallit Nunaanni inuit amerlanerusut ilinniagaqarnissaat pisariaqartipparput - aamma inuit ukiorpassuarni suliffeqareersimasut.

Ullumikkulli inersimasumut suliffimmit soraarluni ilinniagaqalernissaq aningaasaqarnikkut annertuumik unammillernarsinnaavoq. Akissarsiaq ilinniagaqarnersiutinik taarserneqaraangat pisortat inissiaataanni nalinginnaasumik ineqarnermut akiliut akileruminaassinnaavoq.

Tamanna pissutigalugu inuit ilinniagaqaqqinnissaminnut imaluunniit allamik ilinniagaqalernissaminnut piumassuseqartut piginnaasaqarlutillu ilinniagaqalernissartik taamaatissinnaavaat. Siunnersuuteqartup isumaa naapertorlugu ineqarnermut aningaasartuutit innuttaasup ilinniagaqarnissaanut akornutaasariaqanngillat.

Suliffeqarfinni assigiinngitsorpassuarni ilinniarsimasunik sulisunik pisariaqartitsivugut. Siunissami ilinniarsimasunik sulisussatta ilaat ullumikkut suliffeqareersuupput, taakkulu ilinniagaqalernissamik imaluunniit allamik ilinniagaqalernissamik kissaateqarsinnaapput. Tamanna aamma 30-nik, 40-nik, 50-nik ukiulinnut imaluunniit sulii utoqqaanerusunut atuuppoq.

Inuk ukiorpassuarni suliffeqareersimaguni amerlanertigut angerlarsimaffeqalersimassaaq, immaqa aamma ilaqaqalersimassalluni. Taamaattumik inersimasut ilinniagaqalersut tamarmik inissiaminnik qimatsisariaqarnissaat ilinniartullu inaannut nuuttariaqarnissaat pivusorsiortuunngilaq. Ilinniartitaanerup aaqqissuussaannerata inuit inuunerminni assigiinngitsunik inissisimasut pitsaanerusumik periarfissittariaqarpai.

Naalakkersuisut § 37 naapertorlugu apeqqut nr. 2026/95-imut akissuteqarnerminni ilinniartut inaanni ineqarnermut akiliutip pisortallu inissiaataanni ineqarnermut akiliutip assigiinngissutaat nassuiarsimavaat. Akissummi atuarneqarsinnaavoq ilinniartut inaanni ineqarnermut akiliut najugaqartumut ataatsimut qaammammut 869 kr.-iusoq, pisortallu inissiaataanni 2-nik aamma 3-nik initalinni INI A/S-imit aqunneqartuni naatsorsuinermit ilanngunneqartuni ineqarnermut akiliutit agguaqatigiissillugit illoqarfik inissiallu angissusaa apeqqutaallutik qaammammut 2.858 kr.-init 4.936 kr.-inut annertussuseqartut.

Akissutip taamaalilluni takutippaa suliffimmit ilinniagaqarnermut ikaarsaarnermi ineqarnermut aningaasartuutit aningaasaqarnikkut annertuumik akornutaasinnaasut.

Siunnersuutip siunertaraa inuk pisortat inissiaataanni attartortumi najugaqareersoq ilinniagaqarnermini inissiaminiiginnarsinnaassasoq, peqatigisaanillu ineqarnermut nammineq akiliutaa inoqutigiit assingusumik amerlassusillit ilinniartut inaanni akiliutigisartagaannut aallaaviatigut naapertuuttunngortinneqassasoq.

Siunnersuutip siunertarinngilaa ilinniartut inersimasut ilinniartunut allanut sanilliullugit aningaasaqarnikkut pitsaannerusumik inissinneqarnissaat. Siunertaavoq inuk akissarsiamit ilinniagaqarnersiutitut ikaarsaarnermini aningaasaqarnikkut artukkerneqannginnissaa, angerlarsimaffigisaminillu qimatsisariaqannginnissaa.

Siunnersuut ineqarnermut akiliutip nammineq akiligassartaata annertussusaanut tunngavoq. Siunnersuutip kingunerisaanik pisortat ilinniagaqartup innaallagissamut, imermut kiassarnermullu nalinginnaasumik nammineq akiliutigisartagaanik tiguisariaqarnissaat pineqanngilaq. Aqqissuussinerup qanorpiaq ilusilersorneqarnissaa Naalakkersuisut suliarissavaat, ilaatigut ineqarnermut tapiissutit ilinniagaqarnersiutillu pillugit malittarisassat pioreersut eqqarsaatigalugit.

Aqqissuussinermut piumasaqaataassaaq pineqartoq ilinniagaqarnersiuteqarfiusumik ilinniakkamut tiguneqarsimanissaa aammalu ilinniarnerni peqataajuarnissaa. Ukiulli eqqarsaatigalugit qummut killiliisoqassanngilaq.

Inuunerup ingerlanerani ilinniagaqarneq piginnaasanillu ineriartortitsineq periarfissaajuartariaqarpoq. Inuit amerlanerusut ilinniagaqarnissaat, allamik ilinniagaqarnissaat inuiaqatigiinnullu nutaanik piginnaasaqarlutik tunniussaqaarnissaat kissaatigigutsigu, ineqarnermut malittarisassagut tamanna tapersersortariaqarpaat - akornusersornagu.

Pisortanut aningaasatigut allaffissornikkullu kingunerisassat

Pisariaqartinneqartunik inatsisini malittarisassanilu allannguutissanik kiisalu aqqissuussinerup ilusissaanik suliaqarnissaaq aallaqqaammut AC-fuldmægtigip ukioq ataaseq, kr. 500.000-nik sulinerata missaanik annertussuseqartutut nalilerneqarpoq.

Aaqqissuussinerup saniatigut nalinginnaasumik ineqarnermut akiliutip ilinniagaqartullu nammineq akiliutaata assigiinngissutaata matussuserneqarnissaanut pisortat ingerlaavartumik aningaasartuuteqartassapput.

Naalakkersuisut § 37 naapertorlugu apeqqut nr. 2026/95-imut akissuteqarnerminni pisortat inissiaataanni 2-nik aamma 3-nik initalinni inissiat qulit pillugit aaqqissuussinerup nalinginnaasumik ineqarnermut akiliutip ilinniartullu inaanni ineqarnermut akiliutip assigiinngissutaanut agguaqatigiissillugu qaammammut 26.345 kr.-inik aningaasartuuteqarfiusinnaanera naatsorsorsimavaat. Tamanna inissianut qulinut ukiumut naatsorsorlugu 316.140 kr.-it misaannut naapertuuppoq.

Aningaasartuutit annertussusaat ilaatigut illoqarfik, inissiap angissusaa, inoqutigiit katitigaanerat kiisalu ineqarnermut tapiissutit qanoq sunniuteqassanersut apeqqutaassapput. Naalakkersuisut § 37 naapertorlugu akisumminni ineqarnermut tapiissutit naatsorsuinerup ilanngunneqarsimannginnerat ilisimatitsissutigaat.

Naalakkersuisut aaqqissuussinermik suliaqarnerminni pisortanut aningaasartuutiviit ataatsimut naatsorsortariaqarpaat. Siunnersuut una ineqarnermut akiliutip nammineq akiligassartaata annertussusaanut taamaallaat tunngammat, siunnersuutip kingunerisaanik pisortat attartortup innaallagissamut, imermut kiassarnermullu nalinginnaasumik nammineq akiliutigisartagaanik tiguisariaqarnissaat naatsorsuutigineqanngilaq.

Namminersorluni inuussutissarsiuteqarnermut aningaasatigut allaffissornikkullu kingunerisassat

Siunnersuut namminersorlutik inuussutissarsiortunut annertuumik allaffissornikkut imaluunniit aningaasaqarnikkut kinguneqarnissaa naatsorsuutigineqanngilaq.

Sivisunerusoq eqqarsaatigalugu inuit amerlanerusut piginnaasaminnik qaffasaanissamut imaluunniit allamik ilinniagaqalernissamut periarfissaqalerpata, ilinniarsimasunik sulisussanik amerlanerusunik pissarsisoqarsinnaanera siunnersuutip pitsaasumik kingunerisinnaavaa.

Innuttaasunut aningaasatigut allaffissornikkullu kingunerisassat

Innuttaasunut aaqqissuussinermut ilaasunut siunnersuut aningaasaqarnikkut pitsaasumik kinguneqassaaq, ilinniarnernup nalaani ineqarnermut nammineq akiliutaat inoqutigiit amerlassusaat eqqarsaatigalugu ilinniartut inaanni ineqarnermut akiliummut aallaaviatigut naapertuuttunngorlugu appinneqassammat.

Siunnersuut aamma suliffimmit ilinniagaqarnermut ikaarsaarnermi aningaasaqarnikkut ineqarnikkullu toqqissisimanarnerulersitsisinnaavoq, taamaalillunilu inersimasut



amerlanerusut ilinniagaqalernissaat piviusorsiortumik periarfissaalersinnaalluni.
Innuttaasunut allanut siunnersuutip toqqaannartumik aningaasaqarnikkut imaluunniit
allaffissornikkut kinguneqarnissaa naatsorsuutigineqanngilaq.